

四庫全書

子部

欽定四庫全書

子部

山堂肆考卷八十五

六

詳校官中書臣孫溶

主事臣祁韻士覆勘

總校官降調編修臣倉聖脉

校對官助教臣卜維吉

謄錄監生臣劉本立

欽定四庫全書

山堂肆考卷八十五

明 彭大翼 撰

科第

制科

漢唐宋取士之制有賢良方正茂才異等六科乃天子自詔以待非常之才故曰制舉亦曰大科通謂之賢良其制自漢文帝始

賈山上書

漢文帝二年十一月晦日食詔舉賢良方正能直言極諫者潁陰侯騎賈山上書言陛下使天下舉賢良方正之士天下之士莫不精白以承休德乃直與之馳驅射獵一日再三出臣恐朝廷之廢弛百官之墮於事也上嘉納其言

晁錯對策

漢文帝十四年九月親策賢良能直言極諫者錯以對策高第擢為中大夫又言宜削諸侯及法令可更定者

書凡三十篇上雖不盡聽然竒其才

策董仲舒

見求賢

策公孫弘

漢武帝元光元年詔舉賢良文學之士親策之時對策者百餘人太常奏公孫弘第居下天子擢為第一拜為博士待詔金馬門待詔謂以才技徵召之人未有正官故稱待詔

拜為司隸

漢蓋寬饒字次公宣帝朝舉賢良高第拜司隸校尉

拜為議郎

東漢戴封字平仲對賢良策第一拜議郎

遣詣公車

見求賢

待詔公車

漢谷永字子雲成帝建始初舉直言極諫之士永待詔

公車對賢策擢上第

擢舍人

晉武帝詔諸賢良方正會東堂策問京兆人摯虞才學
通博對策擢為太子舍人

遷刺史

晉郗詵泰始中舉賢良方正對策為天下第一遷雍州
刺史武帝於東堂會送問詵曰卿自以為何如對曰臣
舉賢良對策及第猶桂林一枝崑山片玉帝笑之侍中

奏免都官帝曰吾與之戲言耳

舉以逸才

晉索靖字幼安少有逸才舉賢良對策武帝擢為尚書郎

舉以殊操

晉阮冲字德猷有殊操何曾薦之擢賢良第一

策舉穆裴

唐鮑防字子慎貞元元年策賢良方正防為考官得穆

質裴復柳公緯崔邠韋純洪簡熊執易等時美防知人
策過晁董

唐文宗太和二年舉賢良方正帝引諸儒百餘於廷策
之是時考官馮宿見劉蕡對嗟伏以為策過晁董而畏
中官睚眦不敢取

摘抉細隱

唐憲宗元和元年策試制舉之士於是元稹獨孤郁白
居易蕭俛沈傳師輩出焉史斷制策之法其來最久得

人亦多至於末流應科者既非英才而發問之目徃徃摘抉細隱窮所難知而直言極諫之風替矣

指陳闕失

唐憲宗元和三年策試賢良方正直言極諫舉人牛僧孺皇甫湜李宗閔皆指陳時政闕失無所迴避考官楊於陵韋貫之署為上第李吉甫惡其直言泣訴於上且言湜翰林學士王涯之甥也涯與裴均覆策而不自言上不得已貶於陵等僧孺等久之不調各從辟於藩府

舉席建侯

唐席豫字建侯舉賢良方正及第開元中韓休舉以自代拜吏部尚書典選六年當時以休為知人

舉張柬之

唐張柬之字孟將以賢良召時年七十餘矣對策者千餘人柬之第一擢拜監察御史

舉蔣頴叔

宋蔣之奇字頴叔仁宗朝舉賢良方正試六論拜監察

御史

舉秦少游

宋秦觀字少游號太虛公元祐初東坡以賢良方正薦於朝除太學博士黃山谷詩少游五十策其言明且清以初應制科進策五十篇也

父子制科

宋錢易字希白昆之弟也與其子明逸彥遠皆登制科故彥遠謝啓曰兩朝之間相繼者父子十年之內竝進

者弟兄又希白從孫藻以皇祐五年登進士第後十年復登制科其謝啓曰十年二第屢玷於主司一門四人無慙於祖烈

兄弟制科

蘇東坡兄弟同年制策入等故蘇軾謝啓曰兄弟竝竊於賢良衣冠或以為盛事

大科名世

聞見錄宋富弼初遊場屋穆修謂之曰進士不足以盡

子之才當以大科名世公果以禮部試下第時公官耀州西歸陝范文正遣人追公曰有旨以大科取士可亟還公復還京師見文正辭以未嘗為此學文正曰已聞諸公薦君矣久為君闢一室皆大科文字可往就館讀之時晏元獻為相求婚於文正公文正曰公女若嫁官人仲淹不敢知若必欲得國士無如富弼者元獻一見公大愛重之即議婚公遂以賢良方正及第

大科得人

宋張方平字安道穎悟絕人宋綬蔡齊見之以為天下
奇才共以茂才異等薦之中選為校書郎復舉賢良方
正又中選遷著作佐郎後上平戎十策呂夷簡見之曰
大科得人矣

登為三等

東軒筆錄吳育字春卿宋興以來御試制科舉人無登
三等者惟育第三等餘皆四等除此則落之

收入四等

宋仁宗嘉祐六年試賢良方正蘓軾第三等軾第四等
司馬光以輟語切直考入第三等翰林學士難之欲降
其等考官胡宿欲黜之光言是子獨有愛民憂國之心
不可不收上曰求直言而以直棄之天下其謂我何乃
收入四等

二傳中選

澠水燕談吳文肅公奎將舉賢良夢入魏文帝廟升殿
問羣臣優劣帝曰韓延壽為最是夕門下抄書吏楊開

者亦夢公讀楊阜傳翌日告公公覽二傳及試六論一
乃韓延壽楊阜孰優公果中選

六論中科

歸田錄宋夏英公以父沒王事授丹陽主簿上書乞應
制舉真宗召赴中書試論六首一曰定四時別九州聖
功孰大二曰考明堂制度三曰光武二十八將功業先
後四曰九功九法為國何先五曰舜無為禹勤事孰優
六曰曾參何以不列四科是歲中制科

郡將示題

揮麈錄張咸漢川人魏公之父也應制科出蜀過夔州
郡將知名士也一見張遇之甚厚因問曰四科優劣之
差見於何書張無以對郡將曰載孟子注中因指示之
張在道中漫思索著論至都閣試文論以此為首題張
更不注思而就主文錢穆父覽之大喜舉過閣第一

宮人乞詩

夏英公應制舉對策廷下有老宮人曰予閱人多矣賢

良他日必貴以吳綾手巾乞詩公題曰殿上袞衣明日
月硯中旌影動龍蛇縱橫禮樂三千字獨對丹墀日未
斜楊徽之嘆曰真宰相器也

孝廉科

下附秀才科

漢世取士又有孝廉秀才二等齊宋以來州有秀才
之舉隋唐之代其科最重貞觀中有舉而不第者坐
其州長由是其科遂廢故自唐及宋雖進士之科猶
以秀才為號蓋沿漢唐之舊也

許孝廉

東漢許武明帝朝舉孝廉悉推產業與二弟晏普一無所留又許慎字叔重獻帝時舉孝廉

江孝廉

漢江革字次翁齊郡人事母親自挽車鄉里稱之曰江巨孝舉孝廉遷諫議大夫告歸漢元和中詔齊相以穀千斛賜之名聞天下

吳孝廉

東漢吳祐字季英桓帝朝舉孝廉以四行遷膠東相四行者敦厚質朴遜讓節儉也

全孝廉

東漢全柔錢塘人靈帝朝舉孝廉補尚書右丞

种孝廉

東漢种暠字景伯河南人順帝朝舉孝廉官至益州刺史遷司徒子岱舉孝廉不就

荀孝廉

東漢荀彧字文若舉孝廉何顥見而奇之曰王佐才也

雷孝廉

東漢雷義字仲公與陳重為友順帝朝舉茂才讓於重
刺史不聽義遂不應命後同舉孝廉俱拜尚書郎

龔孝廉

東漢龔勝字君實三舉孝廉哀帝徵為諫議大夫

曹孝廉

東漢曹褒字叔通父充習慶氏禮召為博士褒結髮傳

父業舉孝廉遷圉令以禮理人以德化俗

張孝廉

東漢張霸字伯饒七歲通春秋博覽五經鄉人號曰張
曾子初舉孝廉和帝召拜侍中

路孝廉

漢路溫舒東里人授春秋通大義舉孝廉為山邑丞

金孝廉

宋金彥寶慶人舉孝廉第一號義門金氏

邢孝廉

魏邢顯字子昂舉孝廉時人語曰德行堂堂邢子昂

袁孝廉

見雪

任孝廉

唐任敬臣字希古七歲喪母問父英曰若何以報母父曰揚名顯親可也乃刻志從學得舉孝廉虞世南器之

蔣孝廉

唐蔣沆欽緒子舉孝廉與兄演溶弟清俱為才吏乾元中歷咸陽高陵等四縣令美政流行

樊遜文章

已下秀才

漢樊遜字孝謙專心典籍舉秀才第一楊悟曰文章莫過於樊孝謙

僧紹經術

劉宋明僧紹少明經有儒術元嘉中舉秀才科

異行舉

晉庾袞字叔褒清白有異行舉秀才科

弱冠舉

鄭幼麟弱冠舉秀才李孝伯以女妻之後為中書侍郎

宏詞科

舉潘孟陽

唐潘孟陽登博學宏詞科

舉譚世勣

譚世勣字彥威長沙人唐末中詞學兼茂科

有宰相器

唐劉禹錫擢進士第又登博學宏詞科王叔文每稱其有宰相器

類俳優辭

韓愈答崔立之書僕聞有博學宏詞選者用取所試讀之乃類於俳優者之辭顏忸怩而心不寧者數月

乾寧宏詞

唐翁承贊字文饒莆田人乾寧中登進士第擢宏詞科

淳熙宏詞

宋倪思字正甫器質凝重淳熙中中博學宏詞科拜吏部侍郎兼直學士院在朝中立不倚

文章卓偉

柳宗元文章卓偉中博學宏詞科與苑論等聯第授集賢殿正字貞元中拜監察御史元和中為柳州刺史

姿儀洒落

宋周麟紹興中試宏詞第一姿儀洒落望之如神仙中

人

竝中詞科

宋洪皓字光弼鄱陽人三子适遵邁竝中詞科上曰洪皓身陷虜廷乃心王室三子詞科忠孝之報也又李平叔云洪景伯兄弟應宏詞以克敵弓為題洪惘然不知所出有巡鋪老卒觀於案間以問洪曰官人欲知之否洪笑曰非爾所知卒曰不然我本韓太尉世忠之部曲從軍日見有人以神臂弓舊樣獻於太尉太尉令如其

制度製以進御賜名克敵并以歲月告之洪盡用其語
首云紹興戊午五月大將某云云主文大驚喜是歲遂
中科目若有神助焉

三應詞科

宋傅自得少負文名三應博學宏詞科其文氣骨雄壯
波瀾浩渺忠肅公察之子也兄自強弟自得修自得二子
伯壽伯誠聯登科第

投狀自薦

宋景德三年龍圖待制陳彭年奏應宏詞拔萃科明經人許投狀自薦策試經義以勸學者紹聖元年詔立宏詞一科每科場後許進士登科人經禮部投狀乞試依進士法差官考校試以詔誥章表箴銘賦頌赦勅檄書露布戒諭之類

以文自售

宋楊龜山曰試宏詞科乃是以文字自售古人得已自不如此

更易科名

國史宋初立宏詞拔萃科大中祥符立服勤詞學科大觀改詞學兼茂科紹興改博學宏詞科

增試雜文

國史宋初猶循唐制用詩賦神宗始罷之以經術造士又慮不足以盡人才設詞學一科試以雜文

中唐仲友

宋唐仲友台州人中博學宏詞科與朱文公議論不合

後文公知南康仲友為本路憲司嘗按劾之

中留元剛

宋宰相留正孫元剛中博學宏詞科

中晁詠之

宋晁詠之字知道少有異才後舉宏詞

中真德秀

宋真德秀字希元少好學母吳氏織紵以教後中宏詞

中周必大

宋周必大初字洪道後字子充紹興中中博學宏詞科

中呂祖謙

宋呂祖謙隆興中中宏詞科

南壽詞科

宋季南壽紹興中為婺州教授與武進尉周麟之俱應詞科合格詔竝與堂除

少連詞科

宋段少連字希逸真宗朝舉服勤詞學科

武科 附特科

舉謀謨

東漢順帝朝舉剛毅武猛有謀謨可任將帥者

舉猛勇

晉武帝詔舉猛勇秀異

選身材

唐武后詔天下諸州宜教武藝每年準明經進士貢舉
例送由是始置武舉科其制有長槊馬射步射筒射馬

槍翹關負重身材之選凡選皆兵部主之

試策論

唐開元中有軍謀宏遠科天寶中有明習孫吳科宋外
舍生稱武選士內舍生稱武俊士以策論定去取以弓
矢定高下

補左衛長史

唐郭子儀以武舉異等補左衛長史

為右班殿直

宋神宗熙寧中初策武舉之士試義策於秘閣武藝於
殿司及殿試則又試騎射及策於庭策與武藝俱優為
右班殿直武藝次優為三班奉職又次借職末等三班
差役初樞密院修武舉法不能答策者答兵書墨義王
安石曰武舉而試墨義何異學究誦書不曉理者無補
於事先王收勇敢之士皆屬車右者欲以備禦侮之用
則記誦何施帝從之至是始策武舉之士

舉裴端服

唐裴端服樊宗師俱擢軍謀宏遠科

擢高志寧

宋景祐初高志寧天聖末令狐捷等皆中武科

推恩立法

已下特科

聞見錄宋至和中富鄭公當國立一舉三十年推恩之法蓋公與河南進士段希元魏升平同塲屋相友善公作相不欲私之故為天下之制至今行之

推恩授官

宋朝事實及第人為正奏名特科人為特奏名特奏名
第一等二名附正奏名第五甲餘竝登仕郎第二等京
府助教第三等上州文學第四等下州文學竝候郊恩
出官第五等諸州助教止得勅黃袍笏特科亦曰恩科
崇寧特奏狀元

宋崇寧中特奏名狀元徐適瓊林宴罷作詩曰白髮青
衫老得官瓊林頓覺酒腸寬平康夜過無人問留得官
花醉後看

紹興特奏狀元

宋呂永紹興中特奏名狀元

座主

漢法所舉主終身保任柳文云凡號門生而不知恩之所自出非人也

杞梓集門

唐楊嗣復字繼之其權公集序曰貞元中公奉詔考定賢良草澤之士昇名者十七人及禮部擢進士第者七

十有二人鸞鳳杞梓舉集其門而公所擢後登輔相者
十人

桃李滿城

唐劉禹錫寄王侍郎放榜詩禮闈放榜動長安
陌人走馬看一日聲名動天下滿城桃李屬春官

竝居相位

見同僚

同入翰林

唐封舜卿武宗朝翰林學士教之子也登進士第累遷中書舍人入後梁為禮部侍郎知貢舉開平中與門生鄭致雍同受命入翰林致雍有俊才舜卿思拙澁對草綸誥不勝困弊託致雍秉筆議者謂座主辱門生

繼踐台司

郭子儀家傳尚父之帥河中也咸寧郡王渾瑊為門下士不十年接控數州繼踐台庭則曹參之代蕭何太叔之嗣子產也

同知貢舉

歐陽公歸田錄王禹玉乃余為校理時武成王廟所解
進士也至此新入翰林與余同院又同知貢舉故禹玉
贈余詩曰十五年前出門下最榮今日預東堂余答詩
曰昔時叨入武成宮曾看揮毫氣吐虹夢寐閒思十年
事笑譚今日一樽同

審權放處權

南部新書杜審權知貢舉放盧處權有戲者曰座主審

權門生處權

崔沆放崔瀝

崔沆知舉放崔瀝譚者稱座主門生沆瀝一家

竝坐兩序

唐寶歷中楊嗣復知貢舉下榜時父僕射於陵自東洛入覲嗣復率門生迎于潼關宴新昌里第於陵與故人坐堂上嗣復與諸生坐兩序始於陵在考功擢浙東觀察李師稷及第時亦在焉人謂楊氏上下門生時以為

榮

受拜中堂

宋李文正公嘗言其座主王仁裕知貢舉時年已高有數子皆早亡諸孫竝幼每諸門生至門必延於中堂公與夫人偶坐受諸生拜一如兒孫禮備酒饌食諸生至於餅餌羹臠之物皆公與夫人親手調品忽一日生徒畢集出一詩牋曰二百一十四門生春風初長羽毛成衰翁漸老兒孫小他日知誰略有情按王仁裕五代周

時為翰林學士遷尚書知貢舉王溥和凝范質皆其門
生後皆至宰相

引謁裴皞

五代裴皞官至禮部尚書放三榜四人拜相桑維翰竇
正固張礪馬裔孫是也清泰二年裔孫知貢舉纔放榜
謝恩即引諸生詣座主裴公宅謁拜裴公以詩示之曰
宦途最重是文衡天與愚夫著盛名三主禮闈年八十
門生門下見門生

送別元之

宋王元之字禹偁謫黃州蘓易簡知貢舉適放榜奏曰
元之名儒今將行欲令榜下諸生送于郊上可其奏諸
生郊別元之謂狀元孫何曰為我多謝蘓公口占一絕
曰綴行相送我何榮老鶴乘軒愧谷鶯三入承明不知
舉看人門下放門生

稱疾相避

漢胡廣所辟舉皆天下名士與故吏陳蕃李咸竝為三

司蕃等每朝會稱疾避廣時人榮之

曲躬自卑

東漢鄭弘字巨君為太尉時舉主第五倫為司空班次在下每正朔朝見弘曲躬自卑帝問知其故遂聽置雲母屏風分隔其間由此以為故事

選獻紫綬

唐李石元和三年及第後二年賜緋後二年賜紫自釋褐四年之內遂服金紫至長慶二年座主庾公內艱服

闕除尚書右丞始賜紫綬石為門生乃選紫綬金印以獻議者榮之

為撰白麻

唐薛廷老為翰林學士座主庾公拜兗海節度使廷老為門生為撰白麻時人榮之

不送門生

五代宰相桑維翰裴皞門生也嘗謁皞皞不迎不送或問之答曰皞見維翰于中書則庶僚也維翰見皞于私

館則門生也何送迎之有人服其耿介

不喜門生

宋歐陽公晏公殊門生也殊不喜歐陽公故歐公自分鎮叙謝晏公曰出門館不為不舊受恩知不為不深然足跡不及于賓階書問不通于執事豈非飄流之跡愈遠而愈踈孤拙之心易危而多畏動常得咎舉輒累人晏公得書對賓客占十數語授書吏作報客曰歐公有文聲似太草草晏公曰答一知舉時門生已為過矣

門生多秀

唐李宗閔知貢舉門生唐仲薛庠袁郁輩多清秀俊茂
時號玉笋後人玉笋班之名始此

門生孤芳

宋曾子固歐陽公門生也東坡送子固倅越詩曰醉翁
門下士雜遝難為賢曾子獨超逸孤芳陋羣妍昔從南
方來與翁兩聯翩翁今自憔悴子去亦宜然按嘉祐二
年永叔知貢舉曾子固兄弟四人同登科醉翁為參政

時子固亦在館中故云兩聯翩

悉取器玩

玉堂清話李翰為和凝門生後與凝同任學士及凝作
相時翰為承旨適當批詔次日往玉堂輒開和相舊閣
悉取圖書器玩留詩曰座主登庸居鳳閣門生批詔主
鰲頭玉堂舊閣多珍玩可作西齋潤筆不人笑其踈縱
來就師資

宋范文正公以晏元獻薦入館終身以門生禮事之後

雖名位相亞亦不敢少變慶歷末晏公守宛丘文正赴
南陽道宛丘特留歡數日其書題門狀猶稱門生將別
投詩云曾入黃扉排國論却來絳帳就師資聞者嘆服
不稱門生

宋劉安世字器之晚居南京馬涓巨濟作少尹巨濟廷
試日器之作詳定官蓋所取士也而巨濟見器之未嘗
修門生之敬器之不平因以語客客以諷巨濟巨濟曰
不然凡省闈解送則有主人故所取士得以稱門生殿

試蓋天子自為座主豈復可稱門生於他人幸以此謝
劉公客以此告器之嘆服其說

不拜座主

宋王奇字漢謀贛州人幼有聲場屋間為李文定客文
定薨於位章聖臨奠見屏間有詩曰雁聲不到歌樓上
秋色偏欺客路中愛之問知為奇作因召見占對稱旨
特許殿試既登科有謝詩曰不拜春官為座主親逢天
子作門生

同年

同榜人曰同年

連轡舉鑣

唐劉禹錫送張盥赴舉詩序吾不幸向所謂同年友當其盛時連轡舉鑣亘絕九衢若屏風然今來落落如晨星之相望

挂轡交社

唐柳宗元送苑論登第後歸覲序八年冬余與馬邑苑

言揚聯貢於京師自是而後車必挂轡席必交衽量其志知其達于昭代究其文辨其勝于太常

會期集院

唐進士榜出謝恩後便往期集院狀元與同年相見請一人為錄事其餘主宴主酒主樂探花主茶之類咸以其年辟之

會姑蘓臺

宋范石湖撰姑蘓同年會詩序唐人曲江大會長安坊

市為之半空天子至御樓以觀當此之時通榜之士意
氣相予甚厚否則有青雲紫陌之譏宋朝略去浮侈但
存聞喜一宴而同年之制則加詳焉士大夫寧有輕負
此意忽然雲散異日相視如塗之人乎紹興改元建陽
袁起巖張文善俱使浙西始歲五日會同年之在吳下
者于姑蘓之臺賦詩相屬州里傳寫一夕殆遍

才用季同

唐李絳為相元義方言其私同年許季同憲宗問曰人

于同年有情乎絳曰同年乃四海九州之人偶同科第
然後相識於情何有若其人果才雖兄弟子姪之中猶
將用之況同年乎

禮待王祐

五代王祐父徹同光初與桑維翰同年登第拜左拾遺
後維翰入相祐以維翰為父同年生裁書自陳維翰奇
之禮待甚厚自是祐文價日重

抄堤避路

唐王鐸楊收皆薛逢同年後收作相逢作詩曰須知金
印朝天客同是沙堤避路人收聞之怒及王鐸作相逢
又詩曰昨日鴻毛萬鈞重今朝山岳一毫輕鐸又怒之
詞塲著鞭

宋鄧洵美連山人乾祐六年中進士第與司空李昉同
年司空先在禁林出使武陵與洵美相遇贈詩曰憶昔
詞塲共著鞭當時鶯谷喜同遷關河契濶三千里音信
稀疎二十年

得接鸞鳳翅

唐曹鄴字業之杏園即席上同年詩岐路不在天十年
行不至一旦公道開青雲在平地枕上數聲鼓衡門已
如市白日探得珠不待驪龍睡忽忽出九衢僮僕顏色
異故衣未及換尚有去年淚晴陽照花影落絮浮野翠
對面時忽驚猶疑夢中事自憐孤飛雁得接鸞鳳翅永
懷共濟心莫起吳越意

同攀次第枝

唐趙嘏邀同年鄭祥歸漢南時恩門相公鎮山南詩云
年來驚喜兩心知高處同攀次第枝人倚繡屏間賞夜
馬嘶花逕醉歸時聲名本自文章得藩溷曾勞筆硯隨
家去恩門四千里只應從此夢旌旗

向寇持權

宋向文簡公敏中寇忠愍公準同以太平興國五年登
第後文簡秉鈞忠愍以使相守長安作詩寄文簡曰玉
殿登科四十年當時僚友盡英賢歲寒惟有公兼我白首

猶持將相權文簡調之曰九萬鵬霄振翼時與君同折
月中枝細思淳化持衡者得到于今更有誰

王聶成怨

揮塵錄李處邁邯鄲之孫以直秘閣知相州聶賁字遠
山為郡博士王將明甫為決曹掾王聶同年生也始甚
歡洽而聶于樂籍中有所屬意王亦昵之每戒不令前
聶恨之因而遂成仇怨其後甫改名黼為宰相聶以蔡
元長薦改名昌字賁遠擢為侍從及黼大用事貶聶散

官安置衡州益銜黼矣靖康時事大變召登政府黼之
誅死聶有力焉而聶以是歲出知絳州被害紹興中張
殊自北歸過絳驛見壁間血書詩一首時以聶之精魂
所作詩見氏族大全聶姓下

同年遠嫌

宋寇萊公在樞府上欲罷之萊公已知乃遣人告王文
正公旦曰遭逢最久今出求一使相幸同年贊之公曰
將相之任貴極人臣苟朝廷有所授亦當懇辭豈得私

有所干于人也萊公不樂後上議準令出與一甚官王公曰寇準未二十年已登樞府甚有才望與一使相使當方面其風采足為朝廷光上然之翌日降制萊公捧使相誥謝于上前感激流涕曰苟非陛下主張臣安得有此命上曰王旦知卿具道其言萊公出謂人曰王公器識非準所可測也王公在相府抑私遠嫌類如此

同年各黨

宋歐文忠公與王懿恪公拱辰同年進士同為薛簡肅

公子壻然文忠心少之文忠為叅政時吏擬進懿恪僕射文忠曰僕射宰相官也王拱辰非曾任宰相者不可改東宮以至拜宣徽使終身不執政蓋懿恪主李文靖文忠主范文正其黨不同故耳

因緣契分

詩話李摯與李敏同姓同歲同門同年登第摯詩曰因緣三紀異契分四般同

謹重深沉

宋尚書張詠謂人曰吾榜中得人最多謹厚有雅望無如李文靖深沉有德鎮服天下無如王公面折廷諍素有風采無如寇公當方面寄則詠不敢辭

出處相若

宋元祐中舒州有一李亮工者以文鳴縉紳間與蘓黃遊兩集中有與其倡和詩又有李伯時以善丹青妙絕一世且好古博雅多收三代以來鼎彝之類又有李元中字畫之工追踪鍾王時號龍眠三李同年登進士第

出處相若約以先貴無相忘其後位俱不顯

窮達不同

揮麈錄宋晁武子云王文穆欽若以故相來守杭州時
錢塘有一老尉蒼顏華髮矣文穆初甚不樂之詢其歷
履乃同年生惻然哀之遂封章于朝詔特改京秩尉以
詩謝之云當年同試大明宮文字雖同命不同我作尉
曹君作相東風元沒兩般風

同年相訪

范希文二同年滕子京魏介之相訪于丹陽郡作詩云
長江天下險涉者利名驅二公訪貧交過之如坦途風
波豈不惡忠信天所扶相見發大笑命歌倒金壺同年
三百人大半空名呼歿者草自綠存者顏無朱功名若
在天何必心區區莫競富貴路休誇讒嫉夫孔子作旅
人孟軻號迂儒吾輩不飲酒笑殺高陽徒

同年懼挽

宋丁晉公謂初釋褐為饒倅同年白稹為判官稹一日

以片紙假緡五環于公公笑曰榜下新婚京國富室豈
無半千質物耶懼我撓之故矯耳于簡尾書一絕戲之
曰欺天行詐吾何有立地機關子太乖五百青蚨兩家
關赤洪崖打白洪崖人謂晉公朱崖之行兆于此

下第

承平舊纂舉進士不第者有供酒食之費謂之買春
錢

打盹瞌

國史補進士籍而入選謂之春關不捷而醉飽謂之打
盹臊匿名造謗曰無名子退而肄業曰過夏

除虛耗

見元日

題柱

宋袁樞未第時題詩于建安縣南鄉橋柱曰玉龍倒影
臥寒潭人在雲霄天地寬借問何人題此柱茂陵詞客
到長安

納苗

宋饒竦熙寧中舉進士不第以詩投王荊公曰又還垂
翅下青霄歸指臨川去路遥二畝荒田俱賣却要錢準
備納青苗

無棲燕

唐元和中士人下第多為詩刺試官獨章孝標下第為
歸燕詩獻侍郎庾承宣曰積累危巢泥已落今年故向
社前歸連雲大廈無棲處更向誰家門戶飛

失水龍

撫言唐張曙與崔昭緯同赴舉問卜者卜者殊不顧曙
曙有愠色卜者曰郎君亦登第但崔家郎君拜相當于
此時過堂既而張果不第崔首冠曙以詩別之曰千里
江山陪驥尾五更風水失龍鱗昨夜浣沙溪上雨綠楊
芳草為何人後七年崔大拜曙于裴公下及第于崔公
下過堂

宋濟坦率

盧氏雜記唐宋濟老于場屋舉止可笑德宗微行西明寺見濟葛巾方抄書上曰茶請一碗濟曰鼎水方煎自可潑之上曰作何事業是何姓名濟曰姓宋第五應進士舉須臾聞呼官家濟惶懼曰宋五坦率矣嘗試賦失官韻乃拊膺曰宋五又坦率矣後禮部放榜上先問曰宋五得無坦率否竟無名

柳冕安康

遜齋閒覽唐柳冕字敬叔應舉多忌謂安樂為安康榜

出令僕探名報曰秀才康了言不中榜得免為官而無事此回安康了矣

臥雲

唐李頻字德新為方干高弟頻登第干尚未第干寄詩曰弟子已攀桂先生猶臥雲或作僧貫休贈方干詩弟子已得桂先生猶灌園

泣月

唐曹鄴未第詩一辭巖桂叢九泣都門月年年孟春至

看花不如雪唐末進士沈彬未第時嘗夢着錦衣貼月
飛識者謂身不入月宮必不第果然後仕南唐為吏部
郎

張祐失意

唐令狐楚喜張祐詩錄三百首特表薦之值元稹在內
廷上問祐詩高下稹曰張祐雕蟲小技恐變陛下風雅
由是祐遂失意祐以詩自悼曰賀知章口徒勞說孟浩
然身更不疑

孟郊傷情

唐宋遺史孟郊字東野下第詩曰棄置復棄置情如刀
劒傷又再下第詩兩度長安陌空將淚見花其後登第
詩昔日齷齪不足嗟今朝曠蕩思無涯春風得意馬蹄
疾一日看遍長安花進取得失蓋亦常事而東野器宇
不宏偶下第則情隕獲如刀劒傷以至下淚既登科則
志氣充溢一日之間花則看盡何其速耶後授溧陽尉
卒又唐人下第詩氣味如中酒情懷似別人

物論稱屈

唐文宗太和二年親策制舉人昌平劉蕢對策極詆宦官考官馮宿等見蕢策以為過晁董而畏忌宦官不敢取蕢休李邵杜牧崔慎由等二十二人中第皆除官物論囂然稱屈諫官御史欲論奏執政抑之李邵曰劉蕢下第我輩登科得無厚顏

世家不私

聖政編年雍熙二年三月己未親試進士梁顥以下賜

及第至唱名內有李宗諤宰相昉之子呂蒙亨參政蒙
正之弟王紱鹽鐵使明之子許待問度支仲宣之子上
曰斯竝世家子與孤寒爭路縱以藝升天下亦謂朕有
私也竝下第

名慙桂苑

唐羅隱字昭諫唐末餘杭人咸通中累舉進士不第詩
云六載辛勤九陌中卻尋岐路五湖東名慙桂苑一枝
綠膾憶松江滿筋紅浮世到頭須適性男兒何必盡成

功唯應鮑叔深知我他日蒲帆百尺風

夢入桐花

青箱雜記泉州劉昌言下第詩唯有夜來蝴蝶夢翩翩
飛入刺桐花

投逆旅

唐盧仝不第出都投逆旅有一人附火吟曰學織錦綾
工未多亂投機杼錯拋梭莫教官錦行家見把似文章
笑殺他因問之答云舊隸宮錦坊近以薄技投本行云

如今花樣不同且東歸也

遇異人

唐呂嵒字洞賓咸通中再舉進士不第遊廬山遇異人
得長生訣

困長安

杜甫少貧天寶初應進士不第困長安天寶末獻三大
禮賦帝奇之使待詔集賢院

居甫里

唐陸龜蒙字魯望舉進士不第居松江甫里嗜茶置園
顧渚山下

書問孫山

遜齋閒覽孫山應舉末名得解有同試者以書問山得
失山答曰解名盡處是孫山吾兄更在孫山外覽者大
笑山後謝恩榜成名詩曰盤古榜中同進士伏羲手裡
探花郎

詩別杜勤

唐杜勤甫從姪也下第歸甫作詩別之云只今年纔十六七射策君門期第一

詩上主司

唐高蟾累舉不第詩上主司侍郎云天上碧桃和露種日邊紅杏倚雲栽芙蓉生在秋江上不向東風怨未開

詩與營妓

羅隱初赴舉過鍾陵見營妓雲英後一紀下第復見之雲英曰羅秀才尚未脫白隱作詩贈之曰鍾陵一別十

餘春重見雲英掌上身我未成名君未嫁可能俱是不
如人

綱官空歸

續歸田錄蜀人石揚休屢拔鄉薦常屈春官蜀人比之
綱官蓋謂牙校部土貢入京師只空歸也

老婦效舞

黃通累舉不第作官數任年將耳順猶應舉或嘲之曰
老婦舞拓拔剌員呈手藝注云昔有拓拔善舞故號拓

拔舞此言黃已老猶應舉如婦人已老而猶効拓拔舞也

池上避塵

羅隱詩逐隊隨行二十春曲江池畔避車塵如今贏得將衰老閒看人間得意人注云唐進士賜宴曲江杏園隱屢舉不第故曰避車塵唐亡隱依錢氏為從事遷給事中李振亦屢不第乃佐朱溫篡唐將名士盡殺之白馬津名士即隱所謂得意人詩意蓋謂曲江池畔彼皆

得意我二十年避其車塵豈料我今日以不第獨存乃
及見其受禍也

坐上流涕

孫公譚圃黃魯直得洪州解頭赴省試與侯希聖數人
待榜相傳魯直為省元同舍置酒有僕自門被髮大呼
而入舉三指問之乃同舍三人魯直不與坐上數人皆
散去至有流涕者魯直飲酒自若酒罷與公同看榜不
少見于顏色

賺得英雄

國史補唐制進士科甚重其老死文場亦無恨故有詩
曰太宗皇帝真長策賺得英雄盡白頭

倒繡孩兒

筆譚宋苗振名試館職晏殊語之曰君久從任必疎筆
硯宜稍溫習振曰豈有三十年為老娘而倒繡孩兒者
乎既而試澤宮選士賦押韻有王字振曰率土之濱莫
非王由是不中選殊聞之曰苗君竟倒繡孩兒矣

九舉不第

朝野僉載張鷟號青錢學士謂其文萬選萬中也時有
董元九舉不第號白臘明經與鷟為對

五舉不第

郡國雅譚孟賓于五舉不第至天福九年六舉方第每
年下第俱有詩第一年云蟾宮空手下澤國有誰來第
二年云水國二親應探榜龍門三月又傷春三年云仙
島卻回空說夢清朝未達自嫌身四年云雲僧不見城

中事問是今年第幾人五年云因逢日者教重應忽被
雲僧勸卻歸又宋曹組字元龍六舉不第著鐵硯篇以
自見

悔讀南華

唐宣宗好文嘗賦詩有金步搖未能對令溫庭筠續之
庭筠以玉跳脫應之宣帝命處以甲科為令狐綯所阻
蓋綯嘗問其事于庭筠庭筠對曰事出南華非僻書也
冀相公燮理之暇姑宜覽古綯怒奏曰庭筠有才無行

卒不登第除方城尉庭筠有詩曰早知此恨人多積悔
讀南華第二篇按庭筠本名岐字飛卿并州人彥博之
後

不喜孟子

宋李覲字泰伯盱江人素不喜孟子以為孔子尊王孟
子教諸侯為王嘗試制科六論不得其一曰吾于書未
嘗不讀此必孟子注疏也擲筆而出人為檢視之果然
終不中第

杜門不出

宋林敏功字子仁，蘄春人。年十六，應鄉薦，下第歸。嘆曰：「軒冕富貴，非吾願也。」杜門不出三十年。元符末，蔡元度薦之，不就。

上天無因

西清詩話：宋石曼卿下第，集句曰：「一生不得文章力，欲上青天未有因。」聖主不勞千里召，嫦娥何惜一枝春。鳳皇詔下須沾命，豺虎叢中也立身。啼得血流無著處，朱

衣騎馬是何人又云年去年來來去忙為他人作嫁衣
裳仰天大笑出門去獨對東風舞一場

山堂肆考卷八十五

欽定四庫全書

山堂肆考卷八十六

明 彭大翼 撰

學校

國學

周辟雍在長安西北四十里漢辟雍在長安西北七里
古者天子學曰辟雍言壅水環繞如壁也故前世曰
璧池璧沼亦曰學省隋更名國子監後請為辟雍省

四代學

禮王制有虞氏養國老于上庠養庶老于下庠夏后氏
養國老于東序養庶老于西序殷人養國老于右學養
庶老于左學周人養國老于東膠養庶老于虞庠按上
庠東序右學東膠為太學下庠西序左學虞庠為小學
三代學

孟子夏曰校殷曰序周曰庠學則三代共之
漢起太學

光武建武五年初起太學車駕臨視仍賜博士弟子各

有差

晉立太學

晉元帝朝征南將軍戴邈上疏喪亂以來庠序隳廢今
王業肇建萬物權興宜篤道崇儒以勵風化帝然之始
立太學

拜老

東漢明帝永平二年十月上幸辟雍行養老禮以李躬
為五更桓榮為三老乘輿坐東廂遣使者安車迎三老

五更于太學講堂天子迎于門屏交拜禮畢引桓榮及弟子升堂上自為下說諸儒執經問難于前冠帶縉紳之人圜橋門而觀聽者蓋億萬計注云上自為下說言天子親自為其下說書

補員

東漢順帝陽嘉元年以太學新成試明經下第者補弟子增甲乙科員一千人

行大射禮

東漢明帝永平二年二月臨辟雍行大射禮

觀釋奠禮

唐太宗幸太學觀釋奠禮命孔穎達講經畢上釋奠頌
增舍

唐太宗大徵天下名儒為學官增築學舍一千三百區
增廣生員自屯營飛騎亦置博士使授以經能通經者
聽得貢舉由是四方學者雲集京師以至高麗百濟高
昌吐蕃酋長亦遣子弟請入國學升講筵者至八千餘

人

置齋

宋神宗元豐三年令太學置八十齋齋容三十人外舍生二千內舍生三百上舍生一百總二千四百月一私試歲一公試補內舍生間歲一會試補上舍生上舍之試其上等命以官中等免禮部試下等免解試

繪私像

宋太祖建隆二年冬十一月臨國子監詔增葺祠宇塑

繪先聖先師之像自為贊書于孔顏之座端

葺講殿

宋慶歷四年國子監王拱辰等言首善當自京師始今
取才養士之法盛矣而國子監纔二百楹制度狹小不
足以容四方學者請以錫慶院為太學葺講殿以備臨
幸

郡學

白虎通泮宮者半于天子之宮半者象璜也獨南面

禮儀之方有水耳陸德明釋文泮半水也半有水半無水也

魯侯飲

詩魯頌思樂泮水薄采其芹魯侯戾止言觀其旂注云此魯僖公飲于泮宮而頌禱之辭

鄭人游

左襄二十三年鄭人游于鄉校以論執政然明謂子產曰毀鄉校何如子產曰何為夫人朝夕退而游焉以論

執政之善否是吾師也若之何毀之

造立校宮

漢任延字長孫拜武威太守造立校宮自掾吏子孫皆
令詣學受業復其徭役章句既通悉顯拔榮進之郡遂
有儒雅之士

修起橫舍

東漢鮑德有志節昱之子宣之孫章帝朝遷南陽太守
時郡學久廢乃修起橫舍備俎豆黼冕行禮奏樂諸儒

百姓嘆服

化蜀

見太守上

變閩

見觀察使

教生徒

東漢寇恂拜汝南太守修鄉校教生徒聘能為左氏春秋者

修庠序

東漢衛颯遷桂陽太守下車即修庠序之教設婚姻之禮期年中民從其化

修孔子廟

唐倪若水字子泉為汴州刺史增修孔子廟興州縣學廣招生徒親為教誨風化大行

祀孔子祠

唐曹華為兗州節度使下令曰鄒魯禮義之鄉不可忘

本乃春秋祀孔子祠立學宮講誦人始知教

講授經藝

唐高士廉進益州長史引諸生講授經藝學校復興

印給經籍

宋田錫知睦州下車即建孔子祠教民興學校表請入紙國子監印經籍給諸生詔賜之還其紙

書孝友傳

見刺史

益弟子員

宋胡宿知湖州安定胡先生為教授前守滕公大興學校費錢數千萬未幾滕公罷公繼之乃闢齋廳于學之東益弟子員若干人由是使安定公之教得盛于東南而東南之士知本經術行義以為學者公之力為最多

積帑興學

宋曾肇字子開知應天府地當東南孔道宴勞無虛日公曰飾厨傳以邀往來之譽吾不為也乃積公帑之餘

大興學校親加訓導養成人材為多

請田給學

宋滕元發名甫東陽人知鄆州學生食不給民有爭公田二十年不決者公曰學生無食而以良田飽頑民乎乃請以為學田遂絕其訟

學倡于南京

宋晏公殊留守南京興學校延范仲淹為師教授諸生故天下興學自公倡之

學冠于諸郡

宋陳襄知常州郡庠窄小不足以容師生公亟為廣之其規模氣象遂為諸郡之冠公晨入其中坐授諸生經義旁決郡事由是毗陵學者盛于二浙

建學崇儒

宋尹瞻溫江人舉進士通判永州建學崇儒士論翕然稱之

新院延士

宋劉珙知潭州舊有嶽麓書院真廟朝嘗以勅賜額給田與書後經亂蕪廢公一新之養士數千人延禮佳士為之師

縣學

置校官

魏武帝下令縣滿五百戶置校官選其鄉之俊秀而賓興之庶幾先王之道不墜而有益于天下

營學館

唐高宗咸亨元年五月詔曰諸州縣孔子廟堂及學館有破壞并先來未造者遂使生徒無肄業之所先師闕奠祭之儀久致飄露深非崇儒敬本之意宜令所司速事營造

養賢者

宋范純仁知襄邑縣學校倉廩驛舍皆一新之又營學田擇鄉之賢者養于學宮聽政之暇時一至學親勸誘之

選秀民

朱文公任同安簿兼學事身率諸生勵以誠敬開以義理又選邑之秀民充弟子員

武學

唐開元十九年始置太公廟以留侯張良配仲春上戊祭之牲樂之制一如文宣出師命將日引辭於廟仍以古名將十人為十哲配享上元元年尊太公為武成王以白起韓信諸葛亮李靖列于左櫜苴孫武

吳起樂毅列于右以張良為配宋大中祥符元年加謚昭烈武成王

名將圖形

唐建中二年詔史館考定可配享武成王廟者列今古名將六十四人圖其形

學官進秩

宋孝宗乾道四年二月幸武學謁武成王廟監學官進秩一等

命去白起

宋太祖嘗幸武成王廟觀所畫名將指白起曰起殺已降不武命去之乃詔張昭竇儀高錫等取歷代謀臣名將功業始終無瑕者配享

詔升管仲

宋太祖建隆中詔曰武成王廟從祀神像齊相管仲宜塑像升于堂上西河守吳起宜畫像降于廡下

詔復武學

宋慶厯三年詔置武學于武成王廟以阮逸為教授後
議者以為古名將諸葛亮羊祜裴度等豈專學孫吳哉
遂罷武學以立學無謂故也熙寧五年樞密院言古者
出師受成于學文武張弛其道一也仁祖嘗建武學橫
議中輟識者悼之乞復置武學以追成先朝之志詔復
于武成王廟置學

乞興武學

言行錄胡瑗字翼之乞興武學講論語使知忠孝之道

講孫吳使知制勝之術撰成武學規矩一卷時議難之
蔡京談兵

宋羅戩通州人徽宗時命為武學諭上幸學百官先集
蔡京於坐譚兵戩心哂之不聽其語觸怒奪官

德之論陣

宋德之宋蜀州人慶元初擢外省第一累官武學博士
與諸生論八陣之象本乎八卦奇正之變往來相生而
不窮

論戰守

宋孝宗隆興初朱熹應詔入對言君父之讐不與共戴
天非戰無以復讐非守無以制勝時相湯思退方倡和
議不悅除熹武學博士後與洪适論不合而歸

掌兵書

四明志武學置博士學諭各二人掌以兵書弓馬武藝
訓誘學者



山堂肆考卷八十六